

Minister Hooyboer-Winklaar ta duna un "update" encuanto Mon Plaisir, Rosa College, Cristo Rey y Frere Bonifacius



ORANJESTAD(AAN): Na cuminsamento di aña escolar 2014/2015, Minister di Enseñansa, Michelle Hooyboer-Winklaar a duna un update encuanto diferente school basico cu ta of tabata den diferente fase di renobacion completo.

Cristo Rey y Mon Plaisir.

Manera anuncia prome cu cuminsamento di vakantie grandi tanto Mon Plaisir kleuter y basisschool na Oranjestad y Colegio Cristo Rey na Cura Cabay a muda back pa nan

propio edificionan. E proceso di mantencion, pa diferente motibo a conoce reto na tur dos school, pero awo e muchanan y e teamnan di personal di e dos schoolnan aki ta contento di por cuminsa e aña escolar "bek na cas". Esaki ta un alivio grandi pa e alumnonan y personal y e mandatario a bisa di lo bishita e schoolnan aki riba diahuebs ora cu rond Aruba ta celebra e apertura di e aña escolar nobo.

Rosa College: Den vakantie tambe a logra muda Rosa Col-

lege pa e edificio conoci como ex-VAD Printers riba L.G. Smith Boulevard. Hooyboer-Winklaar a splica cu net prome cu cuminsamento di vakantie grandi, ora el a bishita e school, e conclusion tabata cu e molester grandi di paloma den dak y e falta di mantencion durante hopi aña a haci cu simplemente no por a sigui na e school eyan. Esaki ta un situacion temporario y ta den proceso pa wak di tempo e school lo bin na beurt pa un renobacion complete.

Frere Bonifacius: Reunionnan encuanto Frere Bonifacius tambe ta andando. Hooyboer-Winklaar a splica cu esaki ta atrobe un situacion unda cu e propiedad no ta den man di gobierno, pero ta cay bao di SKOA y Obispado. Pa cu inversion di fondonan den e school, e mandatario a bisa cu mester yega na areglonan cu SKOA y Obispado pa cu e parti di fondonan cu mester worde inverti.

Den e caso di e school aki, tin tambe complicacion cu e tereno mes, unda cu e tereno ta zak na cierto caminda y DOW a conseha pa no renoba e school aki, pero pa traha un school nobo na un otro caminda, Minister Hooyboer-Winklaar a bisa. El a añadi cu deliberacionnan cu SKOA ta andando y ta pendiente tambe pa un reunion cu Obispado, pero e personal di e school mes a expresa cu nan ta habri pa bay otro caminda y entretanto nan ta prefera di no muda atrobe, pero keda den e edificio riba L.G. Smith Boulevard te ora cu tin un edificio di school sea renoba of nobo cla pa nan muda.

Segun Hooyboer-Winklaar e team di Frere Bonifacius ta wak e "big picture" y aunke loke nan tin actualmente no ta un school, pero e situacion ta suficiente bon pa nan keda eyan. Di otro banda, Universidad di Aruba a pidi pa e tereno di Frere Bonifacius pa asina por expande nan facilidadnan y pone tur facultad y servicio den un campus hunto.

Finalisando, Minister Hooyboer-Winklaar a expresa cu e combersacion cu Obispado mester bin. Aunke e fondonan pa Frere Bonifacius ta worde poni disponibel pa medio di FDA, mester papia tocante e opcionnan riba mesa y otro ideanan. Entre otro mester evalua si lo haci un mantencion hopi grandi, si lo construi un school completamente nobo na un otro luga y si lo por cambia e propiedad cu Universidad pa e ultimo aki por expande na unda awendia ta Frere Bonifacius.

Mester yega prome na un acuerdo cu e doño di propiedad, unda gobierno ta pone placa den un edificio cu no ta di dje, pero ta haci esaki como parti di e responsabilidad cu gobierno tin pa cu maneho general di enseñansa. Ademas, gobierno kier sa kico e plannan di Obispado ta cu diferente edificio, pasobra tin hopi school cu un necesidad pa mantencion of renobacion y gobierno ta compronde cu na Corsou den pasado Obispado a inverti placa den diferente edificio y ta desea di hiba e combersacion cu na pa wak si nan ta dispuesto pa haci mescos na Aruba.